

Declaración institucional de apoio e solidariedade co pobo venezolano tras os terremotos do pasado 24 xuño.

O mércores 24 de xuño de 2026, o norte de Venezuela sufriu un dobre terremoto que provocou unha emerxencia humanitaria de enorme gravidade. Segundo os últimos datos coñecidos, a traxedia deixa arredor de 3.811 vítimas mortais, 16.740 feridos e un número aínda indeterminado de persoas desaparecidas ou non localizadas, nun reconto suxeito a revisión conforme avanza os labores de rescate e atención ás zonas afectadas.

Os sismos causaron tamén numerosas familias damnificadas e graves danos en vivendas, infraestruturas, equipamentos e servizos básicos. Estimacións preliminares sitúan en preto de 59.000 as edificacións afectadas, o que reflicte a magnitude do impacto material da catástrofe. A situación esixiu a mobilización de medios de emerxencia, equipos de rescate, persoal sanitario, organizacións humanitarias e voluntariado para atender á poboación afectada.

O estado español mantén con Venezuela vínculos históricos, culturais, sociais e humanos especialmente estreitos. No noso país reside unha importante comunidade venezolana e son moitos os concellos españois nos que viven cidadáns de orixe venezolana ou familias con relación directa co país. Por iso, esta traxedia séntese tamén nos nosos pobos e cidades.

O 29 de xuño de 2026, tras o acordo unánime da Xunta de Voceiros da Federación Española de Municipios e Provincias, Concellos, Deputacións Provinciais, Cabidos e Consellos Insulares de toda España gardaron ás 12:00 horas un minuto de silencio en lembranza das vítimas e como expresión de solidariedade do municipalismo español co pobo venezolano.

A convocatoria puxo de manifesto unha posición compartida dos gobernos locais : acompañar ás vítimas, apoiar á comunidade venezolana residente en España e contribuír, dentro das súas competencias e posibilidades, a que a axuda chegue de forma ordenada a quen máis a necesita.

A Deputación Provincial da Coruña expresa o seu profundo pesar polas vítimas dos terremotos rexistrados en Venezuela e traslada as súas condolencias ás súas familias, persoas achegadas e comunidades afectadas.

A Deputación Provincial da Coruña manifesta a súa solidariedade co pobo venezolano, coas persoas feridas, con quen perdeu os seus fogares ou medios de vida e con toda a poboación damnificada por esta catástrofe. A federación fai extensivo este apoio á comunidade venezolana residente en España, que vive estes días con especial dor e incerteza a situación dos seus familiares e lugares de orixe.

Así mesmo, a Deputación Provincial da Coruña recoñece o labor dos equipos de emerxencia, protección civil, persoal sanitario, organizacións humanitarias, voluntariado, asociacións, irmandades, entidades sociais e persoas anónimas que están a contribuír á atención das vítimas e á canalización da axuda.

A resposta de numerosa cidadanía e entidades locais ao minuto de silencio convocado pola FEMP reflicte o compromiso solidario dos nosos concellos co pobo venezolano nestes momentos de loito.

A Deputación Provincial da Coruña reafirma o valor da cooperación descentralizada como instrumento de solidariedade entre pobos e cidades, promovendo a colaboración entre administracións locais para contribuír á recuperación do pobo venezolano.

Medidas e canles de colaboración

Ademais destas mostras de apoio, a Deputación Provincial da Coruña invita ás entidades locais, no marco da autonomía local, das competencias de cada entidade e das dispoñibilidades orzamentarias correspondentes, a valorar distintas formas de colaboración:

1. Activación de axudas económicas extraordinarias destinadas á emerxencia humanitaria, mediante fondos de cooperación ou emerxencia alí onde existan, ou mediante achegas específicas cando cada entidade local o considere posible.
2. Canalización de achegas a través de organizacións humanitarias con presenza efectiva no terreo, capacidade loxística acreditada ou contacto directo coas zonas afectadas, como Cruz Vermella, Cáritas, Unicef, Médicos Sen Fronteiras ou outras entidades especializadas.
3. Aprobación ou adhesión, no seu respectivo ámbito institucional, a declaracións de solidariedade con Venezuela e de apoio ás persoas afectadas.
4. Promoción de campañas informativas para orientar á cidadanía sobre canles seguras, ordenadas e acreditadas de colaboración.
5. Organización de xornadas culturais benéficas, actos públicos de apoio, actividades solidarias ou outras iniciativas impulsadas.
6. Cesión, cando sexa posible, de espazos públicos municipais para accións solidarias promovidas por entidades sociais acreditadas.
7. Realización de xestos institucionais de lembranza, apoio e solidariedade, como a iluminación de edificios públicos coas cores da bandeira de Venezuela ou outras mostras simbólicas acordadas por cada entidade local. Estes xestos simbólicos poderán ir acompañados de accións de sensibilización cidadá e educación para a solidariedade internacional.

A reconstrución deberá orientarse cara a criterios de sustentabilidade, resiliencia fronte a desastres naturais e fortalecemento dos servizos públicos locais, conforme aos Obxectivos de Desenvolvemento Sustentable.

Con esta declaración, a Deputación Provincial da Coruña reafirma o compromiso do municipalismo español coa cooperación, a solidariedade internacional e o apoio ao pobo venezolano ante unha emerxencia humanitaria de especial gravidade.